

getrewe leute, welche mit ihren so beschwarlichen anlagen, darstreckung leibs, gutts und bluets den erbfeindt ihres ausseristen vermögens auffhalten helffen, an itzo alles uber und uber gestossen und die frembde nationen uns auff den halß geladen werden wöllen.

Immassen wir auch die andern unsre benachparte N. Ö. lande solchs erinnert und durch allerley gebürliche mitl und weeg die sachen dahin zu bringen verhoffen, auff das I. F. D. unser gnedigster herr und landtsfürst anders nichts spüren solle, dan das wir als gehorsamiste und getrewe unterthane bey I. F. D. stehn und bleiben, unser geliebtes vatterlandt noch lenger mit hilff des Allmächtigen in rhue und ainickhait erhalten wollen helffen.

Welchs alles wir dem herrn darumben hiemit erinnern, auff das der herr und alle diejenigen so an itzo in unsern lieben vatterlandt so unerhörte sachen attentiren und denunciern treulich gewarnet und daneben gebeten sein wölle, das der herr seines thails den sachen tieffer nachdenckhe und sich selbst sambt alle benachparte so wol diese N. Ö. lande für erschreckliche verderben unnd unwiederbringlichen schaden und nachtl verhütten wölle helffen, welchs do es also beschicht wir es umb den herrn zu verdienen berait und willig wie dan in widrigen faal der herr ime selbst ein schwäre verantwortung vor Gott unnd dem heyligen Reich in der gantzen Christenhait auffladen und zu seiner zeyt die straff gewißlich nit außbleiben würde. Und bietten dieße unsre wolmainende christliche trewe warnung, die wir auff gutt deutsch den herrn hiemit fürbringen im besten wie wir es anderer gestalt nit mainen von unns anzunemen und zu behertzigen. Insunderhait aber so wölle der herr darauff guett acht geben, das wir die raine Augspurgische Confession haben und bekhennen,⁶⁾ welche in heyligen göttlichen wort der propheten und aposteln auch alten vatter lehr wol fundirt und eben diese ist durch khaiser Carl und khaiser Ferdinandum hochloblich gedächtnis denen Reichsständen dise Confession zuegethon mit Reichs constitutionen neben der Catholischen Römischen Religion zuegelassen und also ainiche khetzerische und wiederwertige lehr oder ceremonien khains wegs foviren und do der herr dessen nit genugsamen bericht hat sein wir urbiettig solche unser christliche bekhanntniß, wie die auch an itzo durch die stände des heyligen Reichs dieser confession zugethan von newen in druck gefertigt und wiederholet ist, dem herrn zu ubergeben und zuzustellen.

⁶⁾ *Vgl. Nr. 55, Anm. 6.*

⁷⁾ *Siehe Nr. 59, S. 169.*